



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

**Odluka**  
**o obilježavanju Dana sjećanja na žrtve genocida u Srebrenici**  
**(Nacrt)**

**Predlagač:** Gradonačelnica

**Obradivač:** Gradska služba za  
poslove Informativnog centra

**Sarajevo, mart 2022. godine**

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** gsgv@sarajevo.ba  
**Web:** gradskovijece.sarajevo.ba



Na osnovu člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva na \_\_. sjednici održanoj \_\_. \_\_. 2022. godine, donosi:

(Naert)

**Odluku  
o obilježavanju Dana sjećanja na žrtve genocida u Srebrenici**

**Član 1.  
(Predmet Odluke)**

Ovom Odlukom utvrđuje se 11. juli kao Dan obilježavanja sjećanja na žrtve genocida u Srebrenici i propisuje način njegovog obilježavanja.

**Član 2.  
(Cilj obilježavanja)**

Cilj obilježavanja Dana sjećanja na žrtve genocida u Srebrenici je odavanje počasti žrtvama i preživjelim u genocidu počinjenom u Srebrenici u julu 1995. godine. Ovom Odlukom želimo istaknuti vrijednosti koje su zaštićene međunarodnim pravom o pravima čovjeka, vrijednosti koje su univerzalnog karaktera, bez obzira na prostornu i vremensku dimenziju u kojoj su izvršena krivična djela protiv čovječnosti i vrijednosti zaštićeni međunarodnim pravom.

**Član 3.  
(Način obilježavanja)**

Program aktivnosti za Dan sjećanja na žrtve genocida u Srebrenici utvrđuje gradonačelnica Grada Sarajeva (u daljnjem tekstu: Program) i najkasnije na septembarskoj sjednici predlaže Gradskom vijeću usvajanje Odluke o davanju saglasnosti na Program aktivnosti za Dan obilježavanja sjećanja na žrtve genocida u Srebrenici za narednu godinu.

Za potrebe obilježavanja Dana sjećanja na žrtve genocida u Srebrenici gradonačelnica je ovlaštena, neovisno od Programa iz prethodnog stava ovog člana, predlagati Gradskom vijeću Grada Sarajeva u toku cijele godine različite projekte koji su u funkciji ostvarivanja cilja utvrđenog u članu 2. Odluke.

**Član 4.  
(Stupanje na snagu)**

Ova Odluka stupa na snagu osmog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA**

**Jasmin Ademović**

Broj:  
Sarajevo,

## OBRAZLOŽENJE

### PRAVNI OSNOV

Pravni osnov za donošenje ove odluke sadržan je u članu 26. stav 1. tačka 2. Statuta Grada Sarajeva kojim je propisano da Gradsko vijeće donosi odluke, druge propise i opće akte i daje njihovo tumačenje.

### RAZLOZI DONOŠENJA

Genocid u Srebrenici najgori je zločin na evropskom tlu od Drugog svjetskog rata u kojem je više od 8.000 muslimana sistematski ubijeno samo u gradu Srebrenici, samo zbog svog muslimanskog identiteta, a gotovo 100.000 muslimana ubijeno je u cijeloj zemlji, preko 2,2 miliona ljudi je raseljeno, a između 20.000 i 50.000 žena silovano je u okviru sistematske kampanje etničkog čišćenja i genocida koju su sprovele srpske snage. 11. jula 1995. bosanski grad Srebrenicu, koji je Vijeće sigurnosti Ujedinjenih naroda svojom Rezolucijom br. 819 od 16. aprila 1993. proglasilo zaštićenom zonom, osvojile su snage bosanskih Srba predvođene generalom Ratkom Mladićem i pod vodstvom tadašnjeg predsjednika Republike Srpske Radovana Karadžića. Genocid u Srebrenici prepoznali su Međunarodni krivični sud za bivšu Jugoslaviju koji je bio prvi sud za ratne zločine kojeg su osnovale Ujedinjene nacije, kao i prvi međunarodni sud za ratne zločine nakon sudova u Nürnbergu i Tokiju. Međunarodni sud ima nadležnost nad pojedincima, a ne nad organizacijama, vojnim jedinicama, političkim strankama i drugim subjektima. Za zločine počinjene u Srebrenici 1995. godine Međunarodni krivični sud za bivšu Jugoslaviju izrekao je osuđujuće presude pojedincima: Radislav Krstić, Ljubiša Beara, Zdravko Tolimir, Mujadin Popović, Drago Nikolić, Momir Nikolić, Radivoje Miletić, Blagojević i Jokić, Dražen Erdemović, Dragan Obrenović, Momčilo Perišić, Popović i ostali, i Zdravko Tolimir, Radovan Karadžić, Ratko Mladić, Jovica Stanišić i Franko Simatović, a jedan postupak je obustavljen, jer je optuženi preminuo prije izricanja kazne (Slobodan Milošević). Međunarodni Rezidualni mehanizam za krivične sudove, koji čuva nasljeđe dva pionirska ad hoc međunarodna krivična suda, nastojeći da primjenjuje najbolju praksu međunarodnog krivičnog pravosuđa, sproveo je završetak žalbenih postupaka te izrekao pravosnažnu presudu vojnom i političkom rukovodstvu VRS: Radovanu Karadžiću i Ratku Mladiću te ponovljeno suđenje za dvojicu optuženih: Jovica Stanišiću i Franko Simatoviću.

Pozivajući se na Opću deklaraciju o ljudskim pravima, kojom se proglašava da svako ima pravo na sva prava i slobode utvrđene u njoj, bez obzira na razlike, kao što su rasa, religija ili drugi status, gdje se u članu 3. Opće deklaracije o ljudskim pravima navodi da svako ima pravo na život, slobodu i osobnu sigurnost, braneći civilizacijske vrijednosti, potrebno je na Dan obilježavanja sjećanja na žrtve genocida u Srebrenici odati pijetet prema žrtvama, njihovim porodicama i široj društvenoj zajednici. Na taj Dan potrebno je prisjetiti se i učiti iz priča o preživjelima genocida koji su, uprkos užasnoj mržnji i uništenju koje su doživjeli, obnovili svoje živote dostojanstveno i bez pozivanja na odmazdu ili promicanje mržnje ili podjela. Njihov duh je izvanredan, a njihova humanost inspirativna. S tim u vezi, Grad Sarajevo, kroz Informativni centar, treba organizovati obrazovne aktivnosti za mlade ljude i buduće generacije, gdje će podizati razumijevanje uzroka tih okrutnosti i razinu svijesti o potrebi za kultiviranjem mira u nastojanju zbližavanja ljudi, kako bi naučili lekcije iz prošlosti, stvarajući jače, inkluzivnije zajednice te podstaknuti buduće generacije da poduzmu mjere kako bi se suprotstavile mržnji i netoleranciji.

## **OBRAZLOŽENJE PREDLOŽENIH RJEŠENJA**

Članom 1. nacarta Odluke definiše se predmet Odluke, odnosno utvrđuje 11. juli kao Dan obilježavanja sjećanja na žrtve genocida u Srebrenici i propisuje način njegovog obilježavanja.

11. jul – Dan kada se prisjećamo žrtava genocida u Srebrenici, gdje se na dostojanstven način izražava saučešće i suosjećanje s porodicama žrtava genocida i njeguje kultura sjećanja. 11. juli je Dan kada je Grad Sarajevo u obavezi prisjećati se žrtava genocida oglašavanjem sirena i spuštanjem cvijeta Srebrenice na sarajevskoj Vijećnici.

Članom 3. nacarta Odluke definisamo je da Program aktivnosti za Dan obilježavanja sjećanja na žrtve genocida u Srebrenici utvrđuje gradonačelnica Grada Sarajeva i da najkasnije na septembarskoj sjednici predlaže Gradskom vijeću usvajanje Odluke o davanju saglasnosti na Program aktivnosti za Dan obilježavanja sjećanja na žrtve genocida u Srebrenici za narednu godinu. Gradonačelnici je data mogućnost i da za potrebe obilježavanja Dana sjećanja na žrtve genocida u Srebrenici, neovisno od Programa aktivnosti za Dan obilježavanja sjećanja na žrtve genocida u Srebrenici, Gradskom vijeću u toku cijele godine predlaže različite projekte koji su u funkciji ostvarivanja cilja Odluke. S tim u vezi će se za svaku godinu utvrđivati program prigodnih aktivnosti ili projekti kojima će se obilježiti Dan sjećanja na žrtve genocida u Srebrenici, a time i stvoriti okvir za potrebna finansijska sredstva koja se za tu svrhu trebaju planirati u budžetu Grada Sarajeva. Kada su u pitanju programske aktivnosti predlažemo da 11. juli bude Dan sjećanja na žrtve genocida a da dani prije i poslije tog datuma mogu uključiti različite manifestacije, kao što su, između ostalog tematske izložbe, postavka predmeta i artifakata koje su pripadale žrtvama genocida u Srebrenici, uz multimedijalnu postavku sjećanje na ubijene nevine žrtve genocida (kao tradicionalna i stalna postavka na Dan obilježavanja sjećanja na žrtve genocida u Srebrenici), izgradnja centralnog spomen-obilježja žrtvama genocida u Srebrenici i ostalih prigodnih spomen-obilježja, edukativni programi suočavanja s prošlošću za mlade ljude kako bi se kroz prigodne edukacijske alate, kao što su dokumentarni filmovi, održavanje historijskog časa, radionice, doprinijelo što kvalitetnijoj spoznaji o genocidu u Srebrenicu te na taj način se prevenirao revizionizam, glorifikacija ratnih zločinaca i negiranje sudski utvrđenih činjenica kroz presude MKSJ-a i MRMKS. Aktivnosti na obilježavanju holokausta i genocida kroz saradnju Memorijalnog muzeja Auschwitz i Informativnog centra kroz razmjenu studenata i istraživača te kroz razmjenu zajedničkih projekata bi doprinijelo znatnom širenju svijesti o ratnim zločinima kod mladih ljudi, kao i usvajanju novih znanja na polju međunarodnog humanitarnog i krivičnog prava. Organizovanje obavezne studijske posjete za domaće i inostrane studente Memorijalnom centru Srebrenica, Informativnom centru o MKSJ koji se nalazi u Vijećnici te posjeta memorijalnom muzeju Srebrenica- Galerija 11/07/95 u Sarajevu. U organizovanju obilježavanja Dana sjećanja na žrtve genocida u Srebrenici mogu se uključiti i ostali subjekti u Kantonu Sarajevo i državi BiH koji njeguju i obilježavaju kulturu sjećanja na žrtve genocida u Srebrenici

## **FINANSIJSKA SREDSTVA**

Finansijska sredstva za provedbu ove Odluke obezbjedit će se u budžetu Grada Sarajeva za svaku godinu, a u zavisnosti od utvrđenog Programa aktivnosti za Dan obilježavanja sjećanja na žrtve genocida u Srebrenici ili predloženog Projekta od strane gradonačelnice, a na koje će, po prijedlogu gradonačelnice, Gradsko vijeće dati svoju saglasnost u formi Odluke o davanju saglasnosti na Program aktivnosti i Projekat za Dan obilježavanja sjećanja na žrtve genocida u Srebrenici.